



₹ 5/

# तुबारि

www.pangi.in

अब अंग्रेजी, हिन्दी त  
पंगवाड़ी भाषा अन्तर असी।

Issue 72; 01/03/2018

## बिषय सूची

कलाई ज्ञान त तोउं तेस बठ बुड़िकि।	1
भगवान तने साथ दाता, जे अपु साथ खुद दाते।	2
खास समाचार।	2
धिक हसते।	2
आज मेई सिखु।	2
दोस्ती के जोर (Peer Pressure)	3
तुसी सोभी मां भेण जे यक	4
डॉ ए. पी. जे. अब्दुल कलाम	4

मास्टर : आज तोउ चरे किस भु?

गभुरु : बथ यक साईन बोर्ड पुठ लिखो थियु।

मास्टर : साईन बोर्ड बेलिए चरे एणे कि मतलब?


गभुरु : तेस पुठ लिखो थियु भेड स्कूल असा मठे चले।

## बिडडी सरगट ना पिए तुसी ता तुं टबरे जे नुकसान दायक आसे।

तेंके बोलि तुं भाश खराब भुंते त से शढ़ण बी लगता। तेस नाउं केन्सर बोते। एसे बोली तुस झठ मरते। तुं गेभुरु तुं कोई सुक ना मेता। कि तुस चहांते ना कि तु गेभुरु दर बदार रिहो लोते ? महेणु तेन्हि ठोहरेल ना चहांते ना? तुस आज यक समझदार नागरीक भुणे सेबूत दिए। अपु भयाडि ता गांए महेणू जे मसाल बणे जेसे बोलि होरे बी तुसी हेरी काई नशा छाड़ दिएल।

## कलाई ज्ञान त तोउं तेस बठ अहंकार

यक जुबान ब्रहमणे सुआ देशी अन्तर घेई कइ सुआ ज्ञान शचा। यक देश अन्तर तेन तीर त कान बणाणे शचे। तेस किंया किछ रोजे बाद से होर देश जे गा। तेस देश अन्तर तेन जहाज बणाणे विद्या शिची, किस कि तेस देश अन्तर जहाज बणातेत। तेस किंयां बाद से यक होरे देश गा। तेठि से ई मेहेणु जोई मिआ, जे कि सद घर बणातेत। तेन तेन्हि किंयां घर बणाण शचा।



ईहांणि कते कुते से शोड़े(16) देशी गा। से शोड़े किस्मी विद्या शिचि कइ आ। अपु गी एई कइ से मेहेणु किंयां पुछण लगा कि “पुरी दुनीए अन्तर मोउं किंयां मोटा कोउं असा”।

मेहेणु हेरान भोई कइ तेसे धे हेरते। मठे मठे ए बोक भगवान बुद्ध केई पुज गई। बुद्ध तेस जाणताथ। से तेसे सोबी कमी के बारे बी जाणताथ। से तोउं चंता करण लगा कि तेसे अभिमान तेस खत्म ना कइ छाड़े। यक रोज से भिखारी ई भिख मागणे कटोरु बी साते घिन कइ तेसे साहमणि आ।



तेन ब्रहमणे बोड़े भारी रोभ जोई पुछु “तु कोउं भो? बुद्धे बोलु “अउं आत्मविजये पथिक भींथा।” ब्रहमणे तेसे बोलो शब्दी के मथबल समझणे कोशिश की त तेन बोलु, “यक ममुली हथियार बणाणे बाड़ा तीर बणाई सकता, नाव चलाणे बाड़ा जहाज बी बणाई छांता। मिस्त्री गी बणाई छांता। सद विद्या शचणे बेलि किछ ना भुंतु। अपु मन साफ रखुण ई सोबी केआं मोटी कमियाबि भो। अगर तुं मन सचा ना भोल त सोभ ज्ञान बेकारा असा। अहंकारे बोलि कोई बि महेणू भगवान हेरी न सकता।

ई शुण कई ब्रहमणे अपु गलती पता लगा “अहंकारे बोली बुद्धि खत्म भुंती घेंती। तोउं त बोते की अहंकार किंयां दुर बशे”।

देवी देवता महणू जे मगु, तस ना देते।

आजकल हेण पाँगेई युवा पीढी कि कती की अगर अपू वेली कोइ वी कम ना भूं त सधे मंदिर कि दौड दाते। 'हे भगवान, मूं पास करी छड़।' या फिर 'हे भगवान, मूं नौकरी लेती लगोरी।' मरजी का वन्दा बारे वनाह कता या फिर का शाड़ा चहाने। अगर अनू कने वेली कोई पास भूता या कसे नौकरी लगती त पाँगेई अन्तर कई वी वेरोजगार ना रहता। अगर कसे वी सरकारी महकमें अन्तर कोई वी नौकरी निस्ती त महणूआं दौड लगी घेंती। कदी मंत्रियां कणा फोन कराते बटी जीरा त थणगोली धि नयो अवसरियां केई घेते। अनू सोब कुछ कन कियां त दू चौर मेनेह टेस्टी के तैयारी की त कसे कियां फोन करवाणे जरुते न पडती। आजकल त किलाड़ अन्तर सोब कुछ सुविधा अस्ती। कॉलेज, आई टी आई तठा कम्प्यूटर सेंटर आई। गवरुआं चमे त कुडू दी लंघाते तथ घई आधे ता पढी घेंते, कुछ त नए नए फेशन कते, का कुयां लनू कता का चश्मे लाई इता। देवी देवता बी महणू जे मगु तस ना दाते, वल्कि जे महाणू दी ठिक अस्तु तस दाते।

लेखक:- अमर भरद्वाज



तुबारि पत्रिके अन्तर छपो सोबी लेख, त कथा अन्तर भुओ विचार सिर्फ लेखके भो। तुबारि पत्रिके एसे कोई जिम्मेबारी नेई। तुबारि पत्रिका सिर्फ भाषा सुहलियत करण जे एक मंच देण लगो असी।

तुबारि टीमे कनारा सोबी पांगेई मेहणू ऊनोणि ता नो रात्री के बधेए।



## खास समाचार

- \* 18 मार्च नाऊ रात्रे बी लगते ता ऊनोणि बच बी असे।
- \* 25 राम खोरी नाऊ रात्रे मुकते आज



अपु लेख, विचार, कथा, कविता तुबारि अन्तर छपाण जे बुहन दुतो पता पुठ लंघाए।



### धिक हासते

रोहन अपु बोउ जे – बोउआ! तुस टि बन कर कइ अपु दस्कत कइ सकते ना? बोउए – हां, जेरु! रोहन– ठिक सी त, में रिपोर्ट कार्ड पुठ दस्कत कर।

मशट्रयाणी टिंकु जे बोती: तोउ A B C D ... ..

एतु ना

टिंकु – आं, मेडम जी!

मशट्रयाणी – A कियां बाद की एतुं?

टिंकु – सम्हाई किछ एतुं, मेडम जी!



### हैं पता:

तुबारि पत्रिका

हरी जरनल स्टोर,  
किलाड़ बजार, किलाड़, त:  
पांगी घाटि,  
जिला: चंबा,  
हिमाचल प्रदेश।  
पिन. 176323



### आज मेई सिखु

अँपू स्पष्टीकरण मँहाणू तैड़ी दौणा चाहिए जैड़ी शुणनार तठां समझणार बाड़ा मँहणू खुला दिमागो भोल। अगर कैनी तैणी गलत मनी छैरी तड़ी अँपू सफाई दाणे मतलब अँपू नजर अन्तर गिरनू भा।

### लखा टके वोक

“अपू गभरु वफादारी पता ईजी बब बुढापे अन्तर लगता”

–भेणी बफादारी पता तसे जवानी अन्तर लगता।

–भौए बफादारी पता वयाह बाद लगता।

–भतारे बफादारी पता जोली बीमारी टेम लगता।

–जोली बफादारी पता भतारे गरीबीया अन्तर लगता।

–दोस्ती बफादारी पता दोस्ते बुरे दन अन्तर लगता

लेखक:- अमर भरद्वाज

# दोस्ती के जोर (Peer Pressure)

रेशमी नोउए यक कुई थी। से सुआ होशियार त पढ़ण लिखण अन्तर बि लेएक थी। सोब बोतेथ कि ए कोई अफसर बणती। जपल से हाईस्कूल केआं कॉलेज गई त सोबी के नजर तेस पुठ थी। तेसे होरी सहेली बि थी। पर तेन्हि बच ज्येदी बोके पढ़ाई बारे ना, बल्कि फलाणा कुआ की असा, त केनी कुईए केस कुई जे प्रोपज किओ असा, तसेरी भुन्तिथ। से तेन्हि पुछतीथ कि केनी कोये तु प्रोपज किओ असी ना? त बचारी चुप भोई घेन्तीथ। पर कुछ मेहने पता, मठे मठे तसे मन पढ़ाई केआं ज्यादा घुमुणे, त नोउएं नोउएं झिणे लाणे, होर कोये के बारे बोक करण अन्तर रिझैईते गेई। त से पढ़ाई अन्तर कमजोर भोई गई।



तजेन्दर नोउए यक कुआ बि थिआ। से बि होशियार थिआ, पर बचारा गरीब थिआ। कॉलेज घेणे पता, तसे दोस्ती बिचा सुआ जेई महंगे महंगे फोन अणो थिए, त तसे बि मन करण लगा कि तस बि तीं महंगा फोन लौता। पर तसे ईयां बोट के अतु रुपेई नेओथ कि खरीद सकतेथ। त से कुआ ई उम्मीद अन्तर जुए खेलण लगा कि तस के सुआ रुपेई भोई घेन्ते त से अपु पसंदीदा फोन खरीद सकता। पर से जुए अन्तर शयद ई कपल जीतो भोल। ई कइ कुइ तेन अपु त अपु गीहे बाड़ी जे सुआ परेशान किइ।



जेस बझई जोई एन कुई त कुआ अन्तर ए बदलाब अओ थिया, तस जे अस बोते, “दोस्ती के जोर” (Peer Pressure)। मतलब कि जपल अस अपु यारी-दोस्ती जुए बिशते त अस चहन्ते कि अस बि तेन्केरी ई झिणे डबे, तेन्केरी बोक करे, तेन्केरी फोन रेखु, त तेन्केरी ई खाल पीए बि। ए खास कइ स्कूले त कॉलेजे गभुरु बुछ सुआ भुन्तु। एस केआं दूर बिशणे कोई जगा नेई। असी पुठ हैं दोस्तजरूर कुछ न कुछ बदलाब आणते, चहें खरु भो या खोटु। तोउं त, जपल तुस हाईस्कूल या कॉलेज घेन्ते त ध्यान रखे कि तुसी पुठ “दोस्ती के जोर” कीं पड़ता। से की तुसी अब्बल त खरु कम करण जे जोर देन्ते ना? या तुसी अपु लक्ष केईआ भटकणे त बुरे कम करण जे सलाह देन्ते? अगर तीं असु त तुसी पता असा कि अपु भलाई लिए तुसी की करण। दोस्ती के जोर केआं अपफ बचण जे तुस ए दुई कम कइ सकते।

**पेहला:** पता करे कि तुस कोउं भिन्थ त तुस की चहान्ते। इसे मतलब असु कि तुसी कदी न बिस्रिण कि तुं परिवार त गीहे हालात की असे, होर तुं गी बाड़े, त होरे मेहणु तुसी पुठ की उम्मीद रखो असी। तुसी हमेशा याद रखु असु कि तुस अपफ जे त अपु गीहे लिए करण चहन्ते। तुसी अपु मन अन्तर सोचुण असु कि दस सालुं बाद तुस अपफ जे की हेरण चहान्ते? तेस जे अभेई केआं खइ तेयारी करणे जरूरत असी। याद रखे कि यके रोज अन्तर रोहतांगे टनल न बणी। एस जे सुआ साले तेयारी, त सुआ रुपेई खर्चा करण पड़ते।



**दोका:** पता करे कि तुं दोस्त कोउं भिन्थ त से की चहान्ते। इसे मतलब असु कि तुसी ध्यान देणे एन्तु कि तुं दोस्ती के परिवार कीं असे, त से कत रुपेई कमन्ते। एसे बेलि तुसी पता लगता कि तुस कतु तेन्के बराबरी कइ सकते। तुसी तेन्के भविष्य योजना बारे बि पता लाण जरूरी असा। अगर तुं दोस्ते, अपु बोट के ई लाला बणणे विचार असा, त से किस पेपर देण जे या कॉमिशन किढ़ण जे तेयारी कता? पर अगर तुस तेन्केरीं पढ़ण लगियेल, टेम पास करण लगियेल त तेस पढ़ाई अन्तर तुसी कोई फायदा न मेता।

तोउं त, अउं तुसी जे बोता कि एऊंश केआं खइ जपल तुस अपु यारी-दोस्ति जुए स्कूल या कॉलेज अन्तर बिशेल त खेलियेल, पढ़ेल त एन्हि बोकी के ध्यान रखे। एसे बेलि तुं जिन्दगी सुसुर रेहन्ती त तुस अपु कोशिश अन्तर कामियाब भोई सकते।

**संगति असर** अकबर बादशहे ता बीरबल अपेपु बच बोक करण लगे। तिखेई बीरबले मुहुं कियां यक गलत बोक भोई गई। तिखेई बादशहा सुआ बुरु लागु। तेन बोलु, “तोऊ बोक करणे तेमिज ना रहि। अब दनरात बशरमा भुतां रिहो असा।”

बीरबाले बोलु, “अअं जहांपनाह जी, पहेला ता ई नोथ, अब संगत दोष एण लागो असा।” बादशाह नराज भोई गा।

## तुसी सोभी मां भेण जे यक बोक। बुरी ना मने बा।

कुई त जिल्हाणु जे यक खास बोक। जिखेई तुस जुठ भुंति, तिखेई गाई के सोभ जिल्हाणु पेडी के बंटी कपड़ा लेती। तुसी सोभी मोखयाल ई पता नेई की तेस कपड़े बेलि तुसी केनसर भुंता। ई सोभ बोक दुनीए सोभी किंया मोटे डाक्टर बोते।



किस कि तुस तेस कपड़े ना त धूप छांते ना त तेस साफ कर कइ रखते। यक रोज अंतर तुसी दुई किंयां टाई लिंगि साफ कपड़ा लाण। तेसे बेलि तुस ना त बमार भुंते होर न तुं टाबरा बमार भुंता। किस कि नार बमार भोल ता गीहे सोभ जें बमार भोई सकते किस कि से सोभी जे रोटि शाग बनाती।

सोभि जगाही जिल्हाणु ई शरम कती हें ऐतिर बई झणे कऊ हेरते की जाँ ता। जेसे बोली कि से साउ कि आपु अतिर बाई बनेन (बरा) ता कछे बी धुप ना शुखाणते। तेंके बेलि बी तुस बमार भुंते किस कि जिखेई तकर तुस अपु झणे धूप ना छते तेन्हि केआं कुस्तरी मुशक एंती, जेसे बेलि तुस सुआ बमार भुंते।

### डॉ. ए. पी. जे. अब्दुल कलाम

मिसाईल मैने नाउ किंयां  
मेशुर त भारते पुराणा  
राष्ट्रपति डॉ ए.पी.जे. अब्दुल  
कलाम 15 अक्टूबर 1931  
अन्तर रमेश्वरम, तमिलनेडू  
अन्तर जमो थिया। सन् 1962 अन्तर डॉ0  
कलामे 'भारते अंतरिक्ष अनुसंधान संगठन'  
जोई मिया। डॉ कलामे प्रोजेक्ट डेरेक्टरे रुप  
अन्तर भारते पहेला स्वदेशी उपग्रह 'एस.एल.  
वी टेका' आकाश अंतर लंघाणे जहाज बणाणे  
श्रेय तेस मेता। एसे वजाई जोई त भारत  
पुरे दुनीये अन्तर अंतरिक्षे क्लबे यक सदस्य  
बणा।



सन 1998 अन्तरी पो  
खरण दोकी परमेणु परिक्षण  
अन्तर एसे मोठी भुमिका थी।

डॉ कलामे स्वदेशी लक्ष्य भेदी (गाइडेड मिसाइल) डजेन करो थी। तेन 'अग्नी'  
ता 'पृथ्वी' ई मिसेल स्वदेशी टेकनीकी हसाब जोई बणोओ थी। डॉ ए. पी. जे  
. अब्दुल कलाम देश त समाजे लिए करो अबल कमी के करण केही  
पुरस्कारी बाई बी डेबेए थिए, जेन्हि अन्तर भारत सरकारे बेली दुतो भारत  
सरकारे सोभी किंयां बडे नागरिक समान 'भारत रत्न', पध्म भूषण ता पध्म  
विभूषण असे। ए 27 जुलाई 2015 शिलोंग, मेघालय अन्तर मरा।

### तुबारि मासिक पत्रिका

- ◆अस इ उम्मिद करुं लगे असे कि एण बाड़े रोज अन्तर सुआ मेहणु इस कम अन्तर साथोट देन्ते।
- ◆इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पढ़ूं जे त भाषाई सुहलियत करण जे इ पत्रिका शुरु किओ असी।
- ◆तुबारि यक अवाणिज्यिक पत्रिका भो।
- ◆तुबारि पत्रिका कोई मेहणु, जनजाति, त संस्कृति गलती कढ़ेण जे नेई छपाण लगे। अगर कोई ई सोचता बि त अस जिम्मेवार नेई।
- ◆छपाणे पेहले सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहिल बार पांगवाडि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- ◆आर्टिकल्स ना मिलेण, या घाटि मेहणु के साथोट ना मिलेण त तुबारि पत्रिका कदी बि बंद भुई सकती।
- ◆कोई चीज छपां असी या नेई छपां जे तुबारि संपादकीय टीम पुरा अधिकार असा।
- ◆अस किलाड केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपुं सझाव ओर अर्टिकल्स रखूं जे सुविधा किओ असी।
- ◆अस सोबी पांगी मेहणु जे हात जोड़ कइ अनुरोध कते कि, तुस बि कोई अछा अर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेंघे दिए।

#### तुबारि संपादकीय टीम

- 9418431531
- 9418429574
- 9418329200
- 9418411199
- 9418904168
- 9459828290

